

豫知
章漫
抄摘
錄錄



Z121

00330

1 知
:2904

命

錄

陸
深
著

中
華
書
局

叢書集成初編

知 命 錄（及其他一種）

中 華 書 局 出 版 發 行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：IS 147-101-00894-1/K·367

知命錄

雲間儼山陸深著

嘉靖十四年二月二十一日入關。曉出揚州西門。過胡安定祠。入謁。乃舊司徒廟。改作其東別作司徒廟。未成。觀所謂蜀岡者。蓋地脈自西北來。一起一伏。皆成岡陵。志謂之廣陵。天長亦名廣陵。以與蜀通故云。

二十二日宿張公鋪。是夜風雨大作。抵曉未息。起坐支折足鑪煨生柴。當土牖。晨光煜然。甚有野意。因念得居田間。挾一二村童。當此境界。讀書以自適。願亦足矣。而奔波就老。爲之慨然。

盱眙縣今在全椒。背淮而野。不甚險塞。臧質守盱眙。抗魏太武。古今之奇功也。其戰爭處不復可見。或謂臧質傳宋文帝所爲。殆非實錄。

蜈蚣畏雞。雞死而蜈蚣穴之。此有情無情報應之必然者。予觀五行生尅之數。亦有然者。今夫天一生水。水生木。木生火。火生土。土生金。金復生水。其次火生土。土生金。金生水。水生木。木復生火。推之皆然。水克火。火生土。土復克水。火克金。金生水。水復克火。餘亦復然。但生數疎而克數密。豈猶報恩者常難。而報怨者常易耶。人烏可以報恩之難。而忽生生之德。可不以報怨之易。而勇於釋怨耶。

未至洛陽東十五里。小村店道傍。椿樹成列。內兩株相去一丈五尺。餘土剝露其下。西根一條。大可拱把。

纖直如椽，長過東根，連綴如一，甚奇。木固有連理，今復見連根云。

張文潛舉板蕩詩篇名，其義不同，非也。板蕩之詩，同一亂世也。若單舉一字爲義，如堯稱蕩蕩云，則板豈可訓亂也。

都太僕玄敬嘗爲予言姚少師廣孝還吳中數事。內一事云：少師嘗與嘉定王太史彝同學，太史有姊，每晨爲少師總髻，撫之有恩，故少師事之如母。少師既貴，還欲拜之，姊不肯出，甚堅。家人慫恿之曰：「少師貴人也，且執禮恭，豈宜終拒姊不得已，出立堂中。」少師望見之，卽下拜。至第三拜，姊遂抽身入戶云：「我不要爾拜許多，那見做和尚不了底，是甚麼好人。」少師恬然受之。狄梁公有盧姨，在午橋南別墅，梁公事之甚謹，偶雪中往候之，適姨子攜雉兔自外入，意甚輕簡。梁公啓姨曰：「某今爲相，表弟何樂願悉力成之。」姨曰：「止一子爾，不欲令事女。」公大慙。此二嫗頗相類，可謂英烈矣。

予登華山，蓋至青柯坪焉。自此以上，則攀緣鐵索矣。小憩希夷峽，供菜飯，啓觀希夷蛻骨，作黯淡黃色，入手堅實，而骨節頗長，大惟顚骨頂有二竅爲異。世云作粉紅色，與異香，咸無之。時敍州守趙儒字廷文，在傍拈臂骨一板，云亦漸輕矣。蓋亦經歷五百餘年，信異人也。崔銑子鍾嘗謂余云：劉晦菴少師爲庶子時，奉命祭告，以六月登絕頂，顧其下白霧漲如大海，時見霧中作烟突狀，高低不一，而仰視亦日當天，同行亦有兩司官下山，始知大雷霹靂，驟雨如注，向所見烟突卽雷也，而不聞聲。古云山頭則作小兒啼，豈謂此耶。亢聲自上下者也。

初夏望後行役既倦。趁夕陽登驪山之麓。北望瀟灑。合流如練。東望則秦始皇之非在焉。隱隱若山。當時可想矣。道傍海榴作花。繁英簇絳。擁輿東下。浴溫泉甚適。起觀古石刻而還。

少師晦菴劉公健。字希三。洛陽人也。今贈太師諡文靖。葬北邙之麓。予往拜焉。觀賈南塢開老所撰墓碑。頗不稱公相業。還過其家。問其孫承學中書遺事。說公不甚言。九十四歲終時亦無疾。西過武功會康修撰德涵道此。其惋惜之相約各書所聞見以裨家傳之闕。德涵云。往歲奔喪西歸。見公於洛陽里第。留入臥內。微揭幃帳。示之雙瞳炯然。童顏黑髮。自韓中語云。往歲陳瀾編修借來俞琰參同。是汝批抹的。卻是我幾被此書誤了。既而相對則一老翁也。大聲云。我眼目已昏悶。見人休胡說。丁寧再三。德涵以爲仙去。入斂時甚輕。惟夫人知之。故速舉入柩。人不甚傳云。

咸陽西三十里馬嵬鎮在焉。又西四五里。卽馬嵬坡楊妃葬處。夷然一壠。當路傍。問之土人云。楊妃粉。空土四尺餘可得。如礪砂石。研之可傳。想亦一時傳會之談。直南百步有敗屋一區。卽劉瑾所生之宅。劉本姓箕云。

漢中形勢絕佳。渭南諸山深厚七百餘里。擁蔽其後。西向巴蜀。東接荆襄。不惟輓輸之易。而饒沃亦甲天下。曹洪謂三嶽三塗皆不及。非虛談也。異時亦一都會之地。

益門鎮在渭南二十里。而風景氣候與關陝迥別。秦漢界限。天地自然之理也。自此入連雲棧七百餘里。惟鳳縣嶺與關二處最險。鳳嶺則迤邐而高。雞關則陡峻而島。自入武關而南。棧閣始相連屬。有甚

孤危處。真天下之險道也。武關以北。棧道才十一爾。按宋大安軍圖經云。橋關共一萬九千二百一十八間。護險偏欄共四萬七千一百三十四間。本朝洪武間。普定侯所修連雲棧。橋凡四十五處。共九百六十七間。方正學發褒城。過七盤嶺。宿獨架橋。閣詩一橋至一百四十二間。今橋無數處。有一橋才十餘間。而行旅無阻。想漸次開闢矣。

武夷山形勝佳絕。品題者形容不能盡。獨所謂釣臺者。遠不及嚴灘之奇。褒城雞頭關北五六里。有山臨黑龍江。雙峯孤峭。大類子陵。但自高下跌。而嚴陵則對列若柱云。

山陰也。水陽也。陰氣凝結於西北。至東南而漸微。陽氣極盛於東南。而融液浩蕩。故崑崙在西北。瀛海在東南。文王後天之作用也。高行人澄。京師人與陳給事侃俱使琉球。高還會於廣陵。與余言海中風甚大。與中國風不同。湧浪有如山。故後天巽位。亦置市南巽風也。

王摩詰詩云。褒斜不容憶。褒斜二谷名。卽今棧道是也。寶雞以南曰斜谷。褒城出口曰褒谷。漢鄭子真耕於褒中。曰谷口。

洋縣在漢中府東一百二十里。居萬山中。宋文與可守洋州。卽此地。箕營谷與園池舊跡。東坡所爲題咏者。尚可考尋。按洋字書從水。從羊。本盛大之義。故曰汪洋。莊子曰。望洋。吾上海東臨巨海之上。故亦曰上洋。不知山中何取以名。閩中凡山之險峻者。亦曰某洋某洋云。

洋縣之俗。每歲遇春第四日。居人遊江上。遇葛藤纏繞處。卽解之。謂之解纜。豈古拔楔之遺耶。禪家謂人

不能解脫者。亦謂之葛藤云。

金牛事載蜀記。胡曾詠之前人多有辨其非者。今沔縣西百里。金牛驛在焉。西十里餘。入所謂五丁峽。峽本天成。斷非人力所能與。實漢水之源。至若險陡隄隘處。似有斧鑿如棧道者。或五丁所爲。傳疑可也。入峽二十里。東西相對。兩巖上有石鐘石鼓。形像宛然。民間有謠如地鈴者。曰石鐘對石鼓。金銀有萬五。若人識得破。買了興元府。賈胡過其下。疑有寶鑿之。金鐘形有殘闕焉。

寶雞南二十里。爲大散關。和尚原在焉。山自西來。卽秦嶺一支。不獨爲秦蜀之界。亦中國南北之界也。凡水在嶺南者南行。通名曰江水。在嶺北者北行。通名曰河。朱子釋河。亦曰北方流水之通名。字書江河本諸聲。今關之南北方言。似兼會意矣。